

BONERIANO®

Éksito na final ta eliminá tur e fay-onan ku bo a hasi na kaminda.

EDITOR:
Bonaire Communication Services N.V.

Djammers 21 mart 2023 | Preis:\$1.00

SILENSIO PROMÉ KU TORMENTA

Studiantenan ta siña mas espesie di laman



Studiantenan ta gusta risibí lès ku ta siña nan mas di naturalesa. E seshon di edukashon di STINAPA ta enkargá pa siña studiantenan no solamente den naturalesa, pero tambe pafó ta asta mihó. Nan ta siña diferente sorto di piská, koral duru i koral moli, spòns i hopi mas.



**Benta
fòrsá fuel
di Pdvs**
PAG:5

[www cityshopbonaire.com](http://www.cityshopbonaire.com)
[f](#) City Shop Bonaire
[whatsapp](#) +599 700.6442
[phone](#) +599 717.3666

City Shop
Smart shopping • Better living

2X Double Points Tuesday!
ALL DAY EVERY TUESDAY!
Earn Double Points on your Club Card
Open Monday - Saturday 8pm to 4am | Sunday 7pm to 3am | (599) 717-3504
diviflamingocasino.com | ATM available
DIVI FLAMINGO CASINO

xerox™
**OBERSI
ELECTRONICS
BONAIRE**

**MANTENE BO
VEHIKULO OF
EKIPO DEN
KONDISHON
KU PIESANAN
KUMPRÁ NA NAPA**


Sweeti Bakery Bonaire a kumpli 1 aña

KRALENDIJK — Sweeti Bakery Bonaire resientemente a kumpli 1 aña. Elise Arrindel-Weerstand kende ta propietario di e negoshi ta wak bek riba 1 aña unda hopi kos a bai di manera rápido.

“Un aña a pasa hopi lihé. Mi a kuminsá ku e pasteleria i negoshi den un edifisio. Esaki tabata por debí ku mi so tabata traha. Despues a bin 1 hende mas aserka, mi a haña stazjèr i poko poko espasio a kuminsá bira limitá.” E empresario ta splika ku dado momentu no tabatin espasio pa pone praktikamente nada mas. Mirando ku e edifisio banda di dje tabata bashí, Elise a opta pa hür

esaki aserka. Di e manera aki e e por a separá área di produkshon i risibí kliente. Entretantu Elise tin un kantidat di 8 persona den servisio. E ta splika di ta hopi gradesido na su tim i nan koperashon.” Nos tur a traha duru pa Sweeti ta kaminda e ta aktualmente. Nos ta sinti huntu i evaluá kiko ta nos siguiente paso, kiko mester, kiko falta etc.” Un otro punto ku ta indiká ku e empresa a krese, ta e kantidat di dianan ku e ta habr. Den promé instante Sweeti Bakery tabata habri solamente 3 dia den siman. Awor esaki a bira 7.

“Un boka ta bisa otro i asina nos klientenan ta yega serka nos. Mi ta kere firme

den duna bon servisio. Si algu a bai robes atendé esaki na un manera korekto i ta kordial. Di e manera aki e kliente ta sinti ku ta skuch’è i ta atendé manera debe ser.” Tin momentu ku mester despeshoná kliente debí ku tur kos ta kaba i ta un reto pa mantené vitrina nan yen

Futuro

Mas aleu e propietario ta splika ku un di su retonan mes grandi ta pa haña produktonan básiko. Un ehèmpel ta webu. “Si no tin webu, praktikamente mihó sera e pasteleria numa. Kasi tur produkto mester di webu.” Tòg semper Elise a sa di haña solushon ku yu-

dansa di un òf otro persona ku ta ofresé loke nan tin na kas pa e por sigui traha.

Pronto den e edifisio di Dabboussi na aeropuerto Elise ta bai habri un kafetaria, Blue Lagun. E konsepto ta diferente for di Sweeti pero lo ofresé produktonan di e pasteleria. Interior di e kafetaria ta kla kaba.

“A skohe pa un otro nòmber debí ku e kafetaria lo ofresé entre otro salada, pan, smooti, djus natural i klaro delisianan di Sweeti.” Ki dia e kafetaria por habri su portanan no ta konosí,

debí ku ta wardando pèrmitnan nesario. Un di a plannan pa futuro tabata habri mas lokalidat.

Elise a premirá esakinan aki 4 pa 5 aña. Pero entretantu ya Blue Lagun ta birando realidat.” Chèns ta keda ku Sweeti lo por sigui ekspandé ku mas filial. Boneiru ta kresiendo i tin hopi desaroyo. Sentronan komersial ku ta pendiente pa habri, pues definitivamente por bai bini mas lokalidat di Sweeti Bakery Bonaire,” Elise ta finalisá bisando.



Un bèrgwensa

Un tristesa pa mira kurá di Sentro di Bario Amboina bentá abou. Awor tin AK-SESO ku no tin aksesu na fondo, òf no por manehá e sentronan di bario. Boneiru ta bayendo den un direkshon straño ku hendenan ku no konosé e pueblo ta hunga sabí ku yen teoria, pero den práktika ketu.



Consuelo Memorial

Kaya Maria C. Hellmund-Boom 11 • Bonaire • CN
T/F: (+599) 717 3243 (24h) • info@consuelomemorial.com •

Juan 5:28 “No straña boso di esaki, pasobra e ora lo yega den kual tur ku ta den graf lo tende su bos”.

Nos ta partisipá fayerimentu di

Stanley Crecensio Josepha

mihó konosí komo “kid” èks-trahadó di **Cargill Bonaire**
* 19-04-1945 †19-03-2023

Na nòmber di su señora:

Hendrica Josepha-de Palm

Su yunan:

Roslyn Josepha
Lord Josepha

Su nietu:

Denzel Dortalina

Yu sin doló:

Richard Dortalina

Su rumannan:

Marvis i Lesley Jonis i yunan
Hensley Josepha i Eladia Engelhardt i yu

Erick i Marjorie Josepha i yunan

Amarilis Josepha i yunan

Russell Josepha i yunan

Otmar i Moraima Josepha i yu

Loretha Josepha i yunan

Demas subrino(a)nan:

Sherrell Fidanque i rumannan

Carine Graanoogst i rumannan

Michael Josepha i rumannan

su primu- i primanan, suá- i kuñanan, amigu- i amiganan, bisiaña-, ihá- i tur konosinan.

Su mihó amigunan:

Gaby Felix, Amado Felix, Chaleko Martis

Na nòmber di:

Iglesia Atventista di shete dia Nikiboko/Antriol.

Un danki speshal na Thuiszorg Mariadal, ZW-groep, Dòkternan di Klínika Tera Kòrà, Bon Fysiotherapie, Dr. Heesbeen

Demas famia:

Josepha, Mambre, de Palm, Dortalina, Fidanque, Martina, Jonis, Graanoogst, Ramazan, Engehardt, Keller, Martis, Bokshoven, Windster, Carmelia, Cristina, Da Costa Gomez, Mercera, Wang, Polonius, Christiaan, Baptist, Felix, Brunken, Reimilia, Manuel i Zimmerman.

Si den nos tristesa nos por a lubidá algun famia nos ta pidi nos diskulpa.

Akto di entieru ta tuma lugá djaweps 23 di mart.

Ta risibí kondolensia na Iglesia Atventista na Antriol di 1’or pa 3’or atardi sigi pa sirbishi.

Despues ta hiba nos kerido defuntu na su último lugá di sosiegu den santana `Nos Sosiegu’ na Playa.

Despues di entieru **NO** por risibí bishita di kondolensia na kas.





Bondia, bontardi tambe bonochi. Si, tin hende hopi okupá i ta te anochi nan ta haña chens pa tira bista den korant. Dios bendishoná boso. Enfin, elekshon a pasa, pero awor ta parse mas problema ku promé ku elekshon. Djasabra pasá, mi a papia ku un hende di kaliber. El a bisa mi loke partidonan polítiko ta hasi no ta bon. No tin un regla kon partidonan mester atendé ku otro despues di elekshon.

Ta étika ku esun ku tin mas voto, pa papia ku e otro partidonan i si nan no logra yega na un akuerdo, e ora ei otronan por kuminsá papia pa posibel formashon di esnan ku ménos voto ku e partido grandi, esta ku mas voto. Di tur manera, pueblo ta warda riba formashon pa trabounan ku mester ta hasi, kontinuá. Pues, spera tur partido tin e prosesonan na serio, pa formashon yega. Mi ta kere e próksimo biaha ku mi papia tokante polítika, ya tin un gobièrnu lului lului instalá. No komprondé mi robes, ku lului mi ta referí na sea un nobo òf reformá loke tin te ku awor.

Importante ta pa esun ku sinta, hasi loke ku pueblo ta roga pe. Partidonan ta na altura i nan a primintí ku ta bai duna atenshon, riba loke mas ta gritu di pueblo. Kos ta hopi interesante. Hopi ta puntra si awor ku Demokrat a haña mas voto, si nan ta bai dreña gobièrnu. Di otro banda ta bisa otronan ta bisa nan no ke kambio. Asina ku mas, ta ora òf dia nan tuma den ken ku ken ta bai traha pa Boneiru den e 4 añanan binidero, ta sa ken nan ta.

Awor tin ku sinta warda, i momentu esun ku kuminsá goberná, pueblo wak e bon ku wowo skèrpi. Loke nan ku el a primintí, no ku boka pero riba papel, e mester ehersé nan awor. No ta djis e partidonan a traha un programa pa bai kampaña kuné. Nan mester ta konsiente ku komunitat a vota pa nan logra a menshoná durante kampaña. Meskos ku boso, i tambe yama awor sinta mira ki te soso. Te otro siman Dios ke.

SILENSIO PROMÉ KU TORMENTA

KRALENDIJK- Miéntras Partido Demokrátko Boneriano (Demokrat) a selebrá ku su òptògt di viktoría dja-dumingu 19 di mart, tin indikashon fuerte ku por lo pronto Boneiru lo no tin su gobièrnu nobo. Ta konosí ku a surgi algun opstákulo den formashon di koalishon na momentu ku partido bèrdè a indiká ku por lo pronto nan lo no sinta pa negoshá ku Demokrat.

Den prensa i riba medionan sosial a spekulá i diskutí fuertemente tokante algun senario pa formashon. Remarkabel tabata ku MPB a keda ketu durante e desaroyonan. Hopi a konsiderá esaki komo e silencio promé ku tormenta.

Miéntras tantu e partido blou a saka un komunikado di prensa splikando ku nan ta habrí pa traha ku tur partido. “Nos di MPB a forma un komishon di orientashon ku ta dispuesto na sinta na mesa ku tur partido pa skucha kiko nan tur tin di ofresé. E komishon ta konsistí di: Renata Domacassé, Din Domacassé, Junny Wout i Mazarella Jansen.”

Ku esaki parse ku ta MPB tin e yabi den man. Awor a sorprendé tur

hende ku e anunsio ku M21 i Demokrat a firma un akuerdo di koperashon di frakshon. E dos partidonan ta topa otro riba diferente punto pa goberdashon i ta dispuesto pa kolaborá ku otro pa fiha un fundeshi sólido.

Ainda tin basta duda si UPB lo ta dispuesto pa traha ku Demokrat. E pasonan ku UPB a tuma te ainda no ta demonstrá ku nan ta dispuesto pa forma koalishon ku partido kòrá.

BONERIANO ta dispone di informashon ku Demokrat a manda invitashon for di djasabra último pa UPB ku e intenshon pa nan sinta awe, djamins 21 di mart. Komo reakshon UPB lo a djis manda e mesun komunikado di prensa pa e partido kòrá. BONERIANO a aserká Ramoncito Booi tokante esaki pero te ku publikashon di nos artíkulo, nos no a risibí un reakshon.

Kon pueblo mester mira e desaroyonan aki? No por deskartá ku na aña 2015-2016 Demokrat i UPB a forma koalishon, pero e intento aki a frakasá den algun luna. Si analisá e kampaña polítiko, por konklui ku ainda no tin un base sano pa e partidonan aki dreña

kualke kolaborashon.

E mesun situashon ta konta pa bèrdè i blou, mirando ku Ramoncito Booi na vários okashon a duna su opinion sumamente negativo tokante e partido blou, espesialmente e eks lider Elvis Tjin Asjoe. Pronto lo ta konosí ta kua partido bèrdat ta habrí pa traha ku tur otro.

Aunke tur kos por kambia ainda. Demokrat ta pidi rekonto di tur voto, pues ainda por sosodé ku nan por yega na 4 asiento. Loke sigur ta kambia tur pronóstikonan.

Un kos ta sigur. Dia di elekshon ta bai tokante di voto, pero despues di e dia aki tur kos ta bai tokante asiento.



Vacature (junior) Triagist op Bonaire

Voor de spoedpost voor huisartsenzorg op Bonaire zoeken wij een ervaren

doktersassistent, verpleegkundige of triagist
Flexibel contract van gemiddeld 12 uur per week

De functie

Als (junior)triagist ben je de eerste contactpersoon voor patiënten die met spoed huisartsenzorg nodig hebben in de avond, tijdens het weekend en op feestdagen. Je beoordeelt de urgentie van klachten en informeert en adviseert patiënten en stelt waar nodig gerust. Tijdens de diensten werk je nauw samen met een huisarts en een collega triagist. Op de huisartsenpost werken in totaal zo'n 15 huisartsen, 8 triagisten en 3 junior triagisten.

We zoeken een zeer flexibele collega die de diensten wil invullen die openvallen door bijvoorbeeld vakanties. De ene maand zul je meer uren ingeroosterd worden dan de andere maand. Gemiddeld werk je minimaal 12 uur per week.

Wij vragen

- Minimaal een afgeronde MBO opleiding tot doktersassistent of verpleegkundige op niveau 4;
- Je bent in ruime mate beschikbaar in de avonduren en tijdens de weekenden;
- Werkervaring in de huisartsenzorg is een pre;
- Je kunt goed zelfstandig werken en blijft kalm als het druk is;
- Je bent bereid om een opleiding tot triagist te volgen;
- Het is belangrijk dat je de talen Papiaments en Engels in voldoende mate spreekt; beheersing van het Spaans is een pre.

Wij bieden

- Een gezellig team;
- Een uitdagende functie waarin je je kunt blijven ontwikkelen;
- Scholing en nascholing in je vak;
- Goede arbeidsvoorwaarden gebaseerd op de CAO Huisartsenzorg.

Interesse gekregen?

Dan nodigen we je graag uit te reageren d.m.v. een e-mail naar info@pccarib.com. Bij aanstelling worden er referenties gecheckt en wordt je gevraagd een Verklaring Omtrent Gedrag te overleggen.

Vragen

Voor meer informatie over de functie kun je contact opnemen met locatiemanager mw O. Nicolaas via het e-mailadres onicolaas@pccarib.com

Dabboussi Developments BV

ta buska

un (1) mètsla

un (1) lasser

Interesadonan por manda su CV na
info@dabboussiholdingbv.com
tel. 717.3666

Na konferensia tokante awa di Nashonnan Uní

Ròl prominente pa Boneiru

KRALENDIJK -- Boneiru tin un ròl prominente na e konferensia tokante awa di Nashonnan Uní, ku ta tuma lugá di 22 pa 24 di mart na New York. Djárasion 22 di mart, Boneiru huntu ku Kòrsou, tin na nan enkargo un seshon spesial tokante maneho di awa relashoná ku kambio di klima. Gezaghheber Edison Rijna, ta un di e oradónan. Rei Willem-Alexander,

lo asistí na algun di e presentashonnan.

Ta e promé konferensia di Nashonnan Uní tokante awa den kasi 50 aña. Organisashon ta na enkargo di Reino Hulandes i Tadjikistan. Kasi tur pais tin reto ku awa. Sea ta inundashon òf hustamente sekura ekstremo.

Awa tin impakto grandi riba mantenshon di bida di bíones di hende, riba se-

guridat di alimentashon i energia i riba salú di hende i medio ambiente. Mundiamente 884 mion hende no tin aksesu na awa limpi di bebe. Ademas pa motibu di dispidimentu, kontaminashon i kambio di klima, mas i mas suministro di awa ta bou di preshon.

Meta di e konferensia ta pa yega na un agènda di akshon di awa, den kua estadonan miembro ta kom-

prometé nan mes pa ase-lerá realisashon di meta 6 di desaroyo sostenibel di Nashonnan Uní, na 2030 awa limpi i fasilidat sanitario pa tur hende.

Honor spesial

“Islanan chikitu apénas ta kontribuí na kambio di klima, pero nan ta eksperiensia komo promé i hopi biá na un grado hopi haltu e efektonan negativo. Nos ta mira esei sosodé na Boneiru tambe, motibu pa kua a krea un mesa di klima i resientemente a laga eksper-tonan di gobièrnu hulandes konsehá nos tokante maneho di awa. Parsialmente pa motibu di e inisiativanan akí, a invitá nos pa kompartí nos eksperensia, konosementu i vishon ku partisipantenan na e konferensia. Ta un honor spesial ku nos komo isla chikitu por presentá riba esenario mundial di Nashonnan Uní”, segun gezaghheber Rijna, kende ta orguyoso ku e ekipo konhunto di Boneiru i Kòrsou despues di lunanan di preparashon, a logra traha un programa ku contenido fuerte ku sosio-nan di renombre, bou di kua Global Water Partnership, Local2030 Island Network, Global Island Partnership, Pacific Community, Inter-

national Panel for Delta’s and Coastal Areas i Caribbean Climate Smart Accelerator.

Durante e evento, ademas di Gezaghheber lo papia entre otro presidente di AOSIS, Dr. Lutero i e enviado di klima Prens Jaime de Bourbon de Parme.

Un pènel di diskushon ta inkluí entre otro minister presidente di Aruba, Evelyn Wever-Croes, minister Egbert Doran di Sint Maarten i komisario athunto di gobièrnu di St. Eustatius, Claudia Toet.

Minister hulandes di Infrastruktura i Atministrashon di Awa, Mark Harbers, ta sera e evento. Mirando e kantidat grandi di registrashon, interes di e 193 estadonan miembro di Nashonnan Uní ta grandi.

Gezaghheber Rijna lo papia tambe durante e lansamentu ofisial di Plataforma Internashonal pa Áreanan di Delta i Kosta. Tambe e ta partisipá na un seshon di desayuno na kua rei Willem-Alexander a invitá representantenan di estadonan di islanan chikitu i den desaroyo. Por haña mas informashon i henter e programa di konferensia tokante awa di Nashonnan Uní, na <https://sdgs.un.org/conferences/water2023>.



UN
2023 WATER
CONFERENCE

NEW YORK
22-24
MARCH
2023

91% Habitante ta bisa ku nan ta kontentu

KRALENDIJK – Nobentiu porshento di habitantenan di Boneiru, St. Eustatius i Saba, ta bisa ku nan ta kontentu. Pro medio nan a duna un 6,2 porshento nan grado di felisidat, algu mas ku na 2017-2018. Esaki ta pará den Staat van het

Bestuur 2022, un rapòrt di tendensia ku Ministerio di Asuntunan Interior i Relashon di Reino, kada dos aña ta publiká tokante e maneho públiko. Den e kapítulo den kua Karibe Hulandes ta keda atendé, por lesa entre otro tambe mas ku 74 porshento ta kontentu tokante

e oportunidatnan di edukashon i 71 porshento tokante e situashon finansiero. Kasi 73 porshento ta eksperensia e propio salú komo bon.

Djaluna e minister di BZK, Hanke Bruins-Slot a manda e rapòrt pa Tweede Kamer.

Staat van het Bestuur | 2022



21 di Mart 2023



“Bo ke bira bon?”
(cf Huan 5,6)

Hesus ta puntra e hòmbèr ku tin hopi tempu, 38 aña malu, si e kier kura. E hòmbèr tabata drumí banda di un tanki di awa ku yama Betesda. (cf Huan 5,2) E hòmbèr aki i huntu kuné hopi hende malu mas, tabata kere den e tradishon, ku si nan bula den awa di e pisina, ora esaki move, nan lo a kura. Un promesa di nan tradishon, ku a keda solamente na un promesa.

Hesus, e Promesa di Dios (cf Isaías 7,14) ta aparesé den bida di e hòmbèr malu i ta hasi loke Dios so por hasi: “Lanta kohe bo dragbar i kana numa!” (cf Huan 5,8) Pero tin un kondishon: “Si bo kier keda bon di salú, mira pa bo no sigui den piká ...” (cf Huan 5,14)



Señor pa bo gracia, fortifiká mi boluntat pa mi no sigui biba den piká.

1L Ez 47,1-9,12; Salmo 46,2-6,8-9
Ev Huan 5,1-16



005999-522-4056



Un Snechil Pan



unsnechilpan

Pa paga debe na BOPEC

Benta fòrsá fuel di Pdvsa

KRALENDIJK—Korte a disidí pa pone na benta e kombustibel di e filial di e kompania di estado venezolano, Pdvsa, BOPEC, ku e propósito pa paga debe na BOPEC. Na febrüari un hues di Korte Komun di Hustisia di Karibe Hulandes, a bai di akuerdo ku e solisitut di e empresa Sarex pa benta públiko di e fuel.

E representante di e kompania, ku base na Dubai, Claus Ritzenhofen, a indiká ku mester di tempu pa revisá e pèrmit di e benta. El a sigurá ademas di a kumpli ku e rekisito di depositá 50 mil dòler pa partisipá na e benta públiko. Pero na momentu di reklamá e sèn, no tabatin aksesu na e kuenta.

E benta públiko ta permití tantu BOPEC komo e filial di Pdvsa atkerí sierto likides. Hues sinembargo a opservá ku ainda ta pendiente e desishon di e altura. Loke tambe e sèn ku a logra ku komersialisashon

di e fuel, a keda depositá riba un kuenta ku parse ta ilegítimo.

Sin lisensia

E empresa venezolano a indiká ku e kombustibel mester keda poné na su órden, pues posiblemente por komersialisá i kanselá e debe pa e servisionan di almasenahe.

E curator di likidashon di BOPEC i e hues, Nootboom-Lock, a yega na e konvikshon ku esaki no ta posibel pa riba término kòrtiku, pues Commerchamp tin falta di e lisensia di e ofisina di kontròl di aktividatnan den ekstrasneria, OFAC, pa finalmente yega na e operashon akí.

E desishon hudisial ta indiká ku den e tanki en kuestion tin 371.790 barí di petrolio derivá, ku a hiba na e instalashon na mei 2018, poko promé ku a sera e operashonnan di Pdvsa na Boneiru, komo konsekuensia di e sanshonnan kontra

gobièrnu di Nicolás Maduro.

E kombustibel ta keda bou di kustodia di PPSA, indiká komo un empresa ruman di Commerchamp, pues ámbos ta filial di estado venezolano.

Sentensia

Dia promé di yüli 2021 a kondená PPSA pa paga BOPEC 41,7 mion dòler,

solamente na debe i interes atrasá. Mientrastantu a ordená un retenshon di e fuel, ku e propósito di sigurá ku eventualmente ta kanselá e debe, ounke parsialmente.

Na e oportunitat akí, Van Liere a solisitá benta inmediato di e kombustibel, apesar ku ainda ta pendiente e desishon tokante un apelashon di Commerchamp kontra di e sentensia

menshoná.

E instansianan ku a manehá e likides di BOPEC, a tuma e desishon akí kontra Constantijn Val Liere, kende na desèmber a keda demandá dor di Commerchamp.

E empresa akí ta paresé den e registro komo propietario nominal di e fuel den tanki 1933 di e terminal di BOPEC.



Konferensia di klima i energia

KRALENDIJK -- Isla chikitu, manera na Karibe Hulandes, ta èkstra vulnerabel pa kambio di klima i ya kaba ta nota e efektonan negativo. Hulanda i Aruba ke promové koperashon riba tereno di akshon klimatológiko entre e islanan chikitu rònt mundu. Di 10 pa 12 di mei, ta organisá e promé konferensia karibense di klima i energia, Caribbean Climate & Energy Conference (CCEC), na Aruba.



klima i energia, Rob Jetten, representantenan di pais i organisashonnan, ta reuní na Aruba.

Hulanda i Aruba ke pa e islanan den e área karibense bira un ehèmpel di e aserkamentu klimatológiko riba e paisnan insular chikitu. Riba invitashon di promé minister di Aruba, Evelyn Wever-Croes i minister pa

stitutonan finansiero.

E promé dia di e konferensia ta dediká na transishon di klima i energia den Reino Hulandes. E islanan karibense di Reino lo diskutí ki koperashon tin mester pa logra e metanan klimatológiko di Paris.

E di dos dia di e konferensia tin un enfoque internashonal, e ora ei un pènel amplio di e islanan i organisashonnan, ta bai diskutí ku otro tokante e akshon klimatológiko ku tin mester pa islanan rònt mundu.

Riba e di tres dia e partisipantenan lo bishitá proyektonan di energia na Aruba i lo papia ku hóbenan tokante klima i transishon di energia riba e isla.

Durante e kumbre na

Sharm-el-Sheikh (COP27), Hulanda a tuma akshon pa aselerá transishon di klima i energia na paisnan insular chikitu, manera den e parti karibense di Reino.

Pa e meta akí Hulanda a afiliá na inisiativanan

manera ‘Local2030 Islands Network’ i ‘SIDS Lighthouse Initiative’.

Ku e konferensia di klima i energia karibense na Aruba, gabinete ke sigui traha riba esaki.

Jad's Motors B.V.

ta buska

HR Supervisor

Interesadonan por manda su CV na:

gm@jadsmotorsbv.com

Dabboussi Motors B.V.

ta buska

un (1) Elektro Mekániko
tres (3) Mekániko
dos (2) Mekániko (sakadó di sla)

Interesadonan por manda su CV na

gm@jadsmotorsbv.com

POLÍTIKA

M21 i PDB ta firma un akuerdo di koperashon

KRALENDIJK -- M21 i PDB ta firma un akuerdo di koperashon di frakshon. E dos partidonan ta topa otro riba diferente punto pa gobernashon i ta dispuesto pa kolaborá ku otro pa fiha un fundeshi sólido. E kambio ku Boneiru a indiká di ke durante elekshon di 15 di mart último ta opvio i M21 i PDB pa medio di e akuerdo ta dispuesto pa

traha huntu na bienestar i interes general di Boneiru den Konseho Insular.

M21 ta di opinion ku despues di elekshon tur partido ku ta representá den Konseho Insular mester tin un solo meta: uni forsa i traha na interes di e pueblo di Boneiru. E akuerdo di koperashon aki ta e promé paso den e direkshon aki i nos ta spera ku otro kolega-

nan por djòin nos den esaki na bienestar di Boneiru.

Resultado di elekshon ta muestra ku pueblo di Boneiru ke un kambio.

M21 ta mira hopi puntanan similar den e programanan di M21 i PDB. Nos ta duna espasio, ta respetá resultado di elekshon i tá e diferencia pa medio di sostené e eskoho di nos pueblo.



MPB habrí pa tur partido

KRALENDIJK – MPB su porta ta habrí pa tur partido, esaki e partido ta informá den un deklarashon emití. MPB a tuma nota di un publikashon den medionan di komunikashon i huntu kuné un potrèt ku a saka na momento di konteo di voto, kaminda hopi otro polítiko di tur partido tabata presente.

MPB por bisa di a keda

yamá pa personanan riba lista di diferente partido esta PDB, UPB i M21, ku ke kòmbersá ku e partido. Pero ainda mester bai sinta na mesa pa kòmbersá i negoshá.

Den elekshon di 15 mart, a keda demostrá ku Partido Demokrat ta e partido ganadó ku 3 asiento, sigui pa partido UPB ku tambe tin 3 asiento. Pues ta bisto ku ta

e dos partidonan akí, ta esnan promé yamá pa forma koalishon. MPB no ke defraudá e 2034 votadó ku a depositá nan konfiansa den e partido, tampoko e 855 personanan ku ta sostené e lider polítiko. Esaki ta un dje motibunanan ku porta di MPB ta habrí pa risibí tur hende, tambe ta dispuesto na hiba kòmbersashon ku tur partido ku ta rekonosé

e trabou di e partido i su lider den e último 4 añanan i ke forma un koalishon ku MPB. MPB a forma un komishon di orientashon ku ta dispuesto na sinta na mesa ku tur partido pa skucha kiko nan tur tin di ofresé. E komishon ta konsistí di Renata Domacassé, Din Domacassé, Junny Wout i Mazarella Jansen.

Partido MPB ta kere ku

huntu mester deliberá pa yega na un koalishon nobo pa sigui goberná Boneiru den e próksimo kuater año. MPB ta konvensí ku tin hopi trabou ainda pa finalisá i ku otro trabou mas di prioridat ku mester entamá.

Kualke partido interesá por tuma kontakto libremente ku Renata Domacassé, kende ta e persona di kontakto di MPB.

Demokrat di invitá MPB pa dialogá

KRALENDIJK – Partido Demokrat, komo partido ku a alkansá na e sifra di votashon mas haltu, pa medio di un karta ku a bai pa lider polítiko di MPB, Hennyson Thielman, ta invitá e partido pa formalmente habri un diálogo entre e dos partidonan riba término kòrtiku. Meta ta pa determiná sí konhuntamente por forma un Kolegio Ehekutivo nobo, basá riba un koalishon stabil den Konseho Insular i ku un mayoria di

asiento amplio.

Partido Demokrat ta indiká den su karta, dia 15 di mart elekshon pa un Konseho Insular nobo a tuma lugá. Na promé lugá e partido ta ekstendé pabien na MPB ku e resultado di e votashon.

“Irespekto di kuantu asiento a asigná na listanan, nos tur a kuminsá na sero i nos tur ta habriendo porta pa un periodo nobo den Konseho Insular i tempunan nobo den polítika di

Boneiru. Demokrat ta di opinion ku elekshon a muestra ku pueblo a entregá nos partido un mandato klaro pa yuda duna forma na nos gobernashon ehekutivo den e periodo benidero.

E ta sumamente importante ku pueblo di Boneiru por konta ku un gobièrnu nobo mas pronto posibel. MPB tambe ta representá un parti di nos elektorado,” Partido Demokrat ta skirbi.

Tumando esei na kuenta, Partido Demokrat,

komo partido ku a alkansá na e sifra di votashon mas haltu, pa medio di e karta akí ta kordialmente invitá MPB pa formalmente habri un diálogo entre e dos partidonan riba término kòrtiku. Meta ta pa determiná sí konhuntamente por forma un Kolegio Ehekutivo nobo, basá riba un koalishon stabil den Konseho Insular i ku un mayoria di asiento amplio.

E koperashon di Partido Demokrat ku M21, ta

duna un base duradero di 4 asiento pa un gobernashon duradero i desisivo. Komo fecha, ta proponé awe djammers 21 di mart pa 5’or di atardi. Lo proponé un lugá pa reuní den palabrashon mutuo.

Di banda di Partido Demokrat, e komishon di informadó ta konsistí Edward Rijna, Dudley Wedervoort i Arjen de Wolff. Partido Demokrat ta proponé de Wolff pa fungi komo presidente tékniko di e reunion.

POLÍTICA

Hopi tenshon pa formashon koalishon

Pa: Noel Janga

KRALENDIJK – Tin hopi tenshon pa formashon di koalishon nobo. E wikènt ku ta tras di lomba, nos tur por a tuma nota di un komunikado klandestino i di kartanan di partidonan ku a sali den medionan di komunikashon i media sosial, relashoná ku promé paso pa kuminsá negoshá pa un koalishon nobo. E promé komunikado publiká no di partidonan envolví.

For di djabièrnè un komunikado a sali kaminda ta pronostiká ku ya tin palabrashon entre e miembronan di koalishon aktual, ku ta indiká ku un kontinuashon di e koalishon aktual ta posibel. Tambe nos a tuma nota di un karta publiká di PDB kaminda ta bisa ku nan a tuma e iniciativa komo partido ganador pa kuminsá negoshonnan ku e otro partidonan, pa wak e posibilidatnan pa yega na un koalishon nobo.

UPB tambe a publiká un karta kaminda nan ta trese dilanti nan persepsion di henter e asuntu akí di formashon di un koalishon nobo. I nan no ta dispuesto di sinta warda riba PDB su intencionan pa evitá un posibel kon-

tinuashon di e koalishon aktual.

Partido M21 tambe a manda un karta proyektando nan mirá riba henter e situashon ku ta andando. Nan opinion ta, mester respetá boluntat di pueblo.

Pero remarkabel ta ku te na e momentunan akí no a detektá ningun reashon di MPB.

Esaki ta pa e motibu ku ta nan ta esnan ku por determiná definitivamente kiko lo bai sosodé pa ku formashon òf kontinuashon di un koalishon.

Asiento

Ta importante pa analisá e relashonnan entre e partidonan aki pa asina haña un tiki mas kompromententu ariba e opshonnan ku tin pa forma un koalishon stabil.

Durante di debatenan ku tabatin, nos tur por a mira i komprondé kon sierto partido ta opiná di otro. UPB vários biá no tabata presente mes na debatenan. Kisas pa evitá di tin muchu krittika riba otro partidonan. Aunke ku Ramonsito Booi tabata esun ku tabata opiná mas riba Elvis Tijn Asjoe i Clark Abraham, den su ekpresionnan.

Ku otro palabra, UPB

ta masha kouteloso awor ta ku ken e mester bai traha. Pasobra e dos opshonnan klave ta PDB i MPB.

Ami ta sigur ku UPB no ta deseá di traha ku PDB. Esaki por a komprondé kaba for di den periodo di kampaña kiko Booi su reashon tabata di PDB i su lider.

Den e karta di UPB, bo por sinti tambe ku nan no ta mira e nesidat pa duna PDB e mando pa liderá e proseso di forma koalishon. Tur esakinan ta konfirmá ku e relashon entre e dos partidonan aki ta ketu bai tóksiko. I esaki no ta un relashon saludabel pa drenta koalishon kuné na e momentunan akí pa loke ta trata gobernashon.

E opshon ku a keda ta MPB. Apesar di tur e problemanan relashonal entre e dos partidonan akí, nan a sa di mantené e koalishon aktual te awe intakto. I esei ta un bon señal ku tòg tin posibilidat pa haña otro ainda i renobá i drecha e relashon pa asina sigui ku kontinuashon di e koalishon aktual.

Esaki lo ta un mihó opshon. Pasobra tur plan ku ta kanando lo por sigui nan kurso manera ya ta kustumber kaba e último

kuater añanan.

I naturalmente mester skucha e pueblo su sklamashonnan ta na unda e sapatu ta primi nan mas i pone mas akshon pa remediá e situashonnan akí.

Di dos karta di PDB

Djadumingu un di dos karta a sali di parti di PDB, den kua tin pará ku nan no ta negoshá via medionan di komunikashon, òf sosial. E contenido di e karta akí tambe ta ilustrá un tiki di e relashon tóksiko entre PDB i UPB. Konkluyendo riba esaki, mi opinion ta ku sí UPB i PDB forma un koalishon, e chèns ta grandi ku e gobièrnu lo bai kai na kaminda.

Esei ta hasi MPB i Hennyson Thielman e piesa mas klave i desidido pa ku e formashon òf kontinuashon di koalishon.

Na 2019 MPB a saka 4 asiento. Nan a laga PDB atras ku nan 3 asientonan i bai traha ku UPB ku tabata tin 2 asiento. E motibu prinsipal tabata, e aktitut di PDB. Esaki ta e opstákulo mas grandi di PDB. I e aktitut aki no a kambia ainda pa loke ta trata PDB. Esei ta pone ku chèns ta grandi ku MPB lo no bai kore rísiko ku PDB.

Probablemente nan lo bai ‘play it safe’ dor di bolbe traha ku UPB. Na 2019 nan a baha trapi bai buska UPB, e aña akí nan lo por subi trapi bai buska UPB. Pasobra si no a usa étika 2019, mi ta duda ku lo bai usa esei awor akí.

E kantidat di voto risibí pa PDB i rekòrtan ku a kibra, tur ta bunita, pero

no ta e multitud ei tin ku bai sinta den Konseho Insular òf Kolegio Ehekutivo.

Esnan ku ta ei den kaba sa di e situashon i ta nan mester disidí kiko ta e mihó opshon na e momentunan akí pa ku gobernashon boneriano.

Opservashon.

Dia di debate di KVK, a debatí riba un haf nobo di karga. Di e kuater partidonan ku asiento tres tabata presente PDB, MPB i M21. UPB tabata ousente, pero ta pro pa un haf nobo di karga. MPB i M21 tambe tabata pro un haf di karga nobo.

PDB tabata kontra di esaki. Siendo ku mirando kon e situashon ta desaroyando na waf nobo, e mester keda trasladá pa un otro sitio pronto pa evitá molèster den sentro di siudat.

Awor kiko ta bai pasa sí PDB forma koalishon ku MPB, òf UPB riba e tópiko aki. Mester usa nos mente sano pa tuma desishon. Sí pueblo a vota pa kambio, pero e kambio ei mester ta den e forma kon pa trata ku pueblo. I sí e koalishon aktual ta dispuesto pa tuma e gritu di pueblo akí na serio i aktua riba dje, e koalishon aktual por permanesé manera e ta. Esei ta e mihó opshon.

I esei no ta mi deseo personal, pero basá riba evidensia real, e desishon mas inteligente pa tuma ta mantené koalishon aktual.

Mi opinion nos mester ta realidat.

Evidensia Real. Notisia konfiabel.

Komishon negoshadó di UPB

KRALENDIJK -- Union Patriótiko Boneriano den reunion di direktiva a tuma e desishon pa instala un komishon pa atendé ku e komber-

sashon ku otro partidonan pa konhuntamente yega na un akuerdo pa un gobièrnu nobo. E siguiente personanan lo forma parti di e komishon ta Ludwig Balentin,

Karel Visser, Ramonsito Booi, Xenah Cicilia.

Booi lo representá Union Patriótiko Boneriano den e reunionnan komo bosero.

TCB ta sostené e intento den e paraiso mundial di buseo na kosta

Alexey Molchanov ta bai purba kibra rèkòrt mundial di freediving

KRALENDIJK -- Tourism Corporation Bonaire (TCB) ta sostené e intento pa Freediving World Record 2023 ku ta bai tuma lugá for di 27 te ku 29 di mart na nos isla. E kampion ruso di freediving Alexey Molchanov, ku ke kibra e rèkòrt aktual via e organisashon ofisial di freediving 'International Association for the Development of Apnea (AIDA)', lo representá Servia i e bandera internashonal den su intento.

Molchanov, ku den komunidad di buseo ta konosí komo 'The Machine' i tambe komo e freediver ku mas kurashi den historia, tin kustumber di kibra rèkòrt for di tempu ku e tabatin 5 aña. Aktualmente Molchanov ta disponé di e rèkòrt mundial di freediving den e disiplina Constant Weight



(CWT) na 426 pia.

E aña akí na Boneiru e atleta ta bai purba kibra e rèkòrt aktual di 492 pia den e disiplina di Variable Weight (VWT), ku aktualmente ta den man di e freediver Walid Boudhiah. Paralelo na e intento pa rekòrt mundial akí, algun

di e mihó freediverman hulandes (miembran di Dutch Freediving Association) ta bai purba kibra algun rèkòrt nashonal den e bahia blou di Kralendijk.

"Nos mundu bou di laman protehá i bírgen ta ofresé e mihó esenario pa e hazaña di freediving akí",

segun Miles Mercera, direktor di TCB. "Nos ta kontentu ku nos por yama Alexey i otronan ku ta en buska di aventura bon bini den e paraiso ekológiko ku Boneiru ta i ku nos por mostra e promé Blue Destination na mundu komo un parke di wega di promé kalidat, tantu riba komo bou di superfisie di laman."

AIDA ta e organisadó mas grandi di kompetensia internashonal di freediving. Nan mishon

ta pa mostra mundu ku e deporte akí ta seif, diberido i desafiante i ku e ta un meskla fantástiko di trankilidat interno, konsentrashon i trabou den tim.

Boneiru ta implementá algun protokòl pa salbuardá siguridat optimal durante e intento, ku medidanan manera un sistema di kontrabalaster i un ambulans ku ta para 'stand by' pa garantisá e mihó ambiente posibel pa e intento akí.

ORASHON-PAPIA KU DIOS

"... Señor, siña nos hasi orashon, ..." Lukas 11:1(BS)

Orashon ta un parti vital den e bida kristian. Orashon ta kana man den man ku lesamentu di Beibel. Ora nos lesa Beibel, Dios ta papia ku nos i den orashon, nos ta papia ku Dios. Pues tur dos ta mes importante pa e kristian por biba un bida viktorioso.

Hesus Su disipelnan a mir'E hasi milager, duna bon mensahe i hasi orashon, pero loke a impaktá nan mas, ta e poder di orashon den Su bida. Nan no a pidi'E pa siña nan hasi milager òf duna un bon mensahe pero nan a pidi'E pa siña nan hasi orashon.

Hesus tabatin un bon relashon ku Su Tata, p'esei E tabatin poder den orashon. El a siña nos ku promé ku tuma kualke desishon nos mester komuniká ku nos Tata selestial.

Promé ku Hesus a skohe Su diesdos disipelnan, El a pasa henter anochi den orashon. El a yuna i hasi orashon promé ku El a enfrentá satanas. Ora e sòldanan a bin deten'E den e hòfi, El a kaba di hasi orashon. Hesus mes a demostrá ku nos mester dependé riba DIOS den tur situashon. "... nan mester hasi orashon tur ora bai i no desmayá," Lukas 18:1

Nos tin kustumber ku ora nos ta bai hasi orashon, nos ta bini ku un lista largu di petishon manera ta tienda nos ta bai. No ta asina orashon ta funshoná. Nos bida mester ta den bon relashon ku Dios pa nada no stroba nos orashon.

Orashon ta move e man poderoso di Dios, E ta habri shelu i manda bendishon.

Wilfred i Sigried Antersijn

Produkshon PGM



Programanan di Bonaire.tv

TELBO kanal 70
Flamingo TV kanal 23


Djarsars 21 mart 2023

12.00 Herensia:	Juliana Robertina Wanga-Angela
13.00 Aki Bonaire:	Bishita Fraternal Yuli
14.00 Herensia:	Edmundo Franklin (Eddy) Christiaan
15.00 BAPA:	Tonnie Rossen
16.00 Aktualidat:	Sendion Balentin i Rogen Pineda
17.00 Aki Bonaire:	Desvelo di bustu Broertje Janga
18.00 Herensia:	Jaime i Louisa Emerencia
19.00 BAPA:	Ruthy Vrieswijk-Bergen
20.00 Herensia:	Pedro (Toni) Coffie
21.00 Aki Bonaire:	Gielmon (Funchi) Egbregts
22.00 Herensia:	Anna Sophia Wong Loi Sing-Coffie
23.30 Puerto Latino:	Luis Zárraga

Tur mèrdia 12'or ta kuminsá un programashon nobo di 4 ora. E programashon aki ta ripití pa 24:00.

Studiantenan ta siña mas espesie di laman

Studiantenan ta gusta risibí lès ku ta siña nan mas di naturalesa. E seshon di edukashon di STINAPA ta enkargá pa siña studiantenan no solamente den naturalesa, pero tambe pafó ta asta mihó. Nan ta siña diferente sorto di piská, koral duru i koral moli, spòns i hopi mas.



Washington-Slagbaai habrí 6 dia pa siman

KRALENDIJK -- STINAPA ta anunsia ku Parke Nashonal Washington-Slagbaai, ta habrí 6 dia pa siman, kuminsando 3 di aprel.

Debí na e desaroyo di último tempu a re-evaluá e situashon i a disidí kolektivamente pa enfoká riba e proyekto Parke Bunita un tiki mas den e parke.

Ta asina ku e proyekto aki tin 3 aña andando ku hopi éksito. Pero tòg tin

áreanan mas difisil ku mester di èkstra atenshon.

Pues pa por garantisá seguridat di bishitante i trahadónan, ta sera e parke un dia den siman.

Parke Nashonal Washington-Slagbaai ta habrí di djarsars pa djadumingu, kuminsando djaluna 3 di aprel. E orario ta di 8'or di mainta pa 5'or di atardi. Registrashon pa drenta ta tuma lugá te mi-tar di tres.



STINAPA
NATIONAL PARKS FOUNDATION

Washington Slagbaai National Park
CLOSED ON MONDAYS | APRIL 3RD - NOVEMBER 27TH
2023

Clark Abraham:

“Nos ta sigui drumi un wowo será i otro habrí”

KRALENDIJK — Djadumingu anochi, den presensia di hopi hende, tur siguidónan di Partido Demokrat, e lider máksimo di e partido, Clark Abraham, a ekspresá algun punto skèrpi. Esaki sosodé na

sede di e partido na Antriol. Despues ku e partido kòra a selebrá su viktoria, ku un òptògt ku kantidat di outo, fo’i mèrdia te anochi.

Clark Abraham a bisa: “Awe nos a kore henter Boneiru selebrá bos di

pueblo. Ta nos derecho! Hopi komentario ta sirkulá, ku otro partidonan ke tene Demokrat afó. Awèl, nan lo tene pueblo di Boneiru afó. Pueblo no ta aseptá esaki! Nos t’ei pa yuda pueblo. Pueblo no ta bai aseptá e

asuntu aki. Nos tin un komishon, ku nos a instalá pa papia ku otro partidonan.”

“Hopi den pueblo ta bisa, nan a mira kos straño pasa na urnanan. P’esei nos di partido a pidi pa re konteo. Ta algu ku tur partido tin derecho riba dje. Nos ta na mesa ku tur partido. Pueblo ta pone i kita. Nos ta sigui traha pa bos di pueblo, yega den gobernashon”, Abraham a bisa.

Invitashon di Demorat a sali pa UPB, pero nan no a haña kontesta. “Pa medio di prensa, nos ta tende ku UPB a saka komunikado. Si UPB ta haña ku e ta un partido ku respèt, e bin na mesa huntu ku nos! Nos a ofresé nan den negoshashon, pa nan tin eksklusividat. Nos ta disponibel

pa sinta ku UPB. Si bo ke sirbi pueblo, bo ta hasié na mesa i no den prensa!

Nos a primintí pa algu duradero i nos ta para p’e. Nos ta traha pa interes di pueblo boneriano. Nos ke traha ku otronan, ku tambe tin mesun pensamentu. Partido Demokrat ta mas grandi, pasobra pueblo ke pa nos goberná! Drumu ku un wowo será i e otro habrí, “Clark Abraham a terminá bisando.

Abraham a risibí diferente aplouso fuerte durante su spich i e simpatisantenan ta determiná, ku Demokrat –no- por keda pafó di gobernashon.

Despues agrupashon Foyan Boys i Fenty Music a pèrkurá pa bon ambiente, hendenan a gosa.



Proyekto di Murphyn Henar Foundation

Shete studiante siguiendo entrenamentu pa bira ‘dive master’

KRALENDIJK – Na e momentu aki tin 7 studiante boneriano ta siguiendo un programa di entrenamentu finansiá pa Murphyn Henar Foundation, un fundashon lantá na honor póstumo di ‘dive master’ na Buddy Dive Murphyn Henar, kende a fayesé na 2019. Murphyn Henar Foundation ta ofresé beka na hóbennan boneriano ku ke sigui estudio pa forma nan karera profeshonal den buseo.

Dia 26 di novèmber 2019 Murphyn Henar a fayesé. El a bai den historia komo un leyenda den buseo. Murph, manera tabata yam’é kariñosamente, a traha na Buddy Dive



desde 1993 te na momentu ku el a fayesé na 2019. E tabata bon konosí pa su bon beis semper, su pasenshi fin sin, ademas bon konosementu di buseo na Boneiru. E tabata un mèntòr pa hopi miembro di su tim i ketu bai ta un íkono na Boneiru. A lanta Murphyn Henar

Foundation pa honra e espíritu i memoria di Murph.

Mishon

Mishon di e fundashon ta pa duna adultonan hóben na Boneiru e oportunitat pa un djòp den industria di buseo. Dunando entrenamentu e hóbennan aki, ku kisas no tin fondo pa hasi esaki nan mes, Murphyn Henar Foundation ke krea un futuro pa nan den industria di buseo na Boneiru.

Hasiendo aki Murphyn Henar Foundation ta kontinuá ku e ròl di Murphyn den e komunidad boneriano. E ròl di un mèntòr ku a trasasá su saber riba tereno di buseo ku hopi pashon i entusiasmo.

Programa

E kandidatonan ku sigui e programa di Murphyn Henar Foundation ta pasa

den un programa di treinen ekstensivo den kua nan ta haña treinen spesífiko pa bira ‘dive master’.

Banda di tur e kursonan nesenario pa bira ‘dive master’, e studiantenan lo haña kursonan adishonal manera di identifikashon di piská, mantenshon di ekipo i di tanki, entremetu di hospitalidat i merkadeo. Nan ta partisipá tambe den akshonnan di limpiesa bou di

laman i den programanan di renobashon di ref, pa asina siña mas tokante e importancia di konservashon di naturalesa.

Martin Cicilia

Kordinadó di e proyekto aki ta Martin Cicilia, asistente di mèneder na Buddy Dive Resort. E ta alabes mèntòr pa e studiantenan. El a bisa: “Mi ta sinti mi mes estrechamente konektá ku e hóbennan aki. Mi ta asina orguyoso di nan logronan. Mi ta sinti aworaki komo sifuera mi tin 7 yu.”

Na momentu ku e studiantenan finalisá e programa, nan ta kla pa forma nan karera den sektor di buseo ku hopi konosementu, abilidadat i pashon pa e bida bou di laman.



Konstruí en bes di destruí

KRALENDIJK – “Ban konstruí en bes di destruí.” Esaki ta reakshon di Selimah Agostien di Parke Libertat, riba un publikashon riba Facebook.

E publikashon riba página di Facebook di Elvio Thomas, ta lo siguiente: “Esta un bèrgwensa. Lesa loke tin mas abou i husga pa bo mes kon por asepta ku ta hasi propaganda pa alkohòl na banda di un sitio spesial pa mucha. Apesar e parke ta duru será na kadal,

kada biá ku mi pasa su dilanti.”

Agostien ta reakshoná: “Ta Elvio òf ta Elvia. Segun mi ta Elvia. Buska un manera di wak bo mes, huma sigaria na skol riba e muchanan. Buska kos bo hasi sua, stòp di kana buska kos pa kibra i prinsipalmente sí bo no ta koperá ku nada.”

E kosnan akí e hendenan ta hasié di kurason i ku sodó di nan frenta, segun Agostien.



Krèsh Bon Kwido a bishitá biblioteka

KRALENDIJK-- Akohida pa mucha "Krèsh Bon Kwido" a bishitá Biblioteka públiko Boneiru. Bishitá di e muchanan i lider tabatin di aber ku e tema tráfiiko. A kontu e muchanan kuenta i tambe hasi obra di man relashoná ku e tópiiko.



STCB ta partisipá na enkuentro WIDECAST

KRALENDIJK – E tim di Sea Turtle Conservation Center (STCB), e siman akí ta partisipando na tantu e enkuen-

tro WIDE CAST, komo e simposio internashonal di turtuga na Cartagena, Colombia. Huntu ku sientífikonan

i konserveshonistanan di rònt mundu, ta diskutí e último investigashon i konservashon di turtuga.

Buskamentu di webu na Rincon

KRALENDIJK -- Pastoral Hubenil di parokia San Luis Beltran ta organisá buskamentu di webu i tambe kampaña di kleur. Un invitashon pa tur mucha dia 2 di aprel awor na un santu sakrifisio di misa 10'or di mainta.

Despues di misa ta ranka sali ku buskamentu di webu riba tereno di Parokia. Tambe riba e dia aki ta saka premio pa esnan ku a kleur mas bunita den e kampaña di klùr.

Pa registrá i risibí plachi di klùr pa e kampaña di klùr mester manda un mensahe riba página di Facebook di Parokia òf por tuma kontakto ku sr. Lendon Leito na +5999 667-3732.

Lastu dia pa entregá plachi di klùr ta dia 30 di mart awor.

E meta di Pastoral Hubenil ta pa sigui organisá tipo di eventonan sosial aki pa stimulá e ánimo di nos muchas i hóbenan den nan bida kristian.

BESCHIKKING

Het Gerecht in Eerste Aanleg van Bonaire, Saba en Sint Eustatius heeft op **25 januari 2023** in de zaak van **BON202200464, Nelson Miguel Emerenciana**, geboren te Bonaire op 13-10-1971, onder curatele gesteld wegens geestelijke toestand met benoeming van **Yamilett Merien Emerenciana**, geboren te Bonaire op 30-01-1976 tot curator.



DUSHI TEMPU DI TELEVISION

Ku e seri aki mi ke hiba boso den tempu. Mi ke rekordá huntu ku esnan ku a lanta den añanan sesenta i setenta television di e tempu aya. Television "pretu ku blanku". Tambe pa laga e generashon despues sera konosí ku loke tabata dibertishon pa mucha, hóben i adultonan den dékadananan sesenta i setenta riba nos isla. TeleCuraçao a drenta operashon dia 31 di yùli 1960.

Bugs Bunny

Bugs Bunny, meskos ku Popeye the Sailorman, Casper the Friendly Ghost, Pink Panther i otro 'cartoon'-nan ku tabata pasa na TeleCuracao den añanan sesenta i ochenta no tabata trahá komo serinan di television. Tabata produkshonnan pro-

dukshonnan produ- dusí atrabes di añanan, pero ku na momentu ku Telecuracao a bai den aire a kuminsá pasa den e espasio konosí komo 'Kinderuurtje'. Bugs Bunny a haña bida na fin di añanan trinta na studionan di Warner Bros, kreá anteriormente pa Leon Schlesinger Produc-

tions. Originalmente e bos úniko di Bugs Bunny tabata interpretá pa Mel Blanc.

"Eh...What's up, doc?"

Bugs ta un sorto di konèchi, un 'haas', koló shinishi ku blanku, ku ta gusta burla di tur

hende. E ta karakterisá pa un aksènt di Brooklyn, un barío di New York. Ademas konosí pa su trikinan. Su ekspreshon úniko i konosí ta: "Eh...What's up, doc?".

Atrabes di su popularidad durante e época di oro den produkshonnan di animashon (cartoons) na Merka Bugs Bunny a bira un íkono kultural merikano i maskota di Warner Bros.


Bugs tabata e strea den mas ku 160 pelíkula kòrtiku, produsí entre 1940 i 1964. Mas aleu el a aparesé den buki di strep (comics). E ta e karakter di 'cartoon' ku a aparesé den mas pelíkula ku tur otro figura di 'cartoon'.

Kreashon kolektivo

Di akuerdo ku Chase Graig, kende a skirbi i pinta e promé 'Bugs Bunny'-comic den korant, Bugs no tabata kreashon di un persona so, sino di sinku òf seis direktor i skirbidó di 'cartoon', inkluyendo Charlie Thorson.

Graig: "E storianan di Bugs Bunny tabata resultado di un grupo di persona ku tabata aportá ku nan idea i aventuranan."



Bugs Bunny a aparesé pa promé biá den e pelíkula 'Porky's Hare Hunt, proyektá riba pantaya grandi pa promé biá dia 30 di aprel 1938. E tabata ko-dirigí pa Ben 'Bugs' Hardaway i direktor Cal Dalton.



MONCHI & TONCHI

Polítika...
Sirko a kaba, pero sirko ta sigui.

Awèl sí. Sirko ku payasonan pa yega i mantené poder!



KOLOFÓN

Editor: Bonaire Communication Services N.V.
Kaya Irlanda 12,
Tel. 717-8482
Redakshon: extrabon@gmail.com
avisobon@gmail.com
Wèpsait: www.extraboneiru.com
Facebook: Extra Boneiru

Direktor
Shirley Martis
785-3824
796-3824

Partner na Aruba
Awe Mainta
Partner na Kòrsou
Extra
Partner na Boneiru
Live99

Redakshon
Papi Antoin
Nathaly
Evertsz-Ipcendencia
Davienuska Janga
Velli Gijsbertha
Edson Pietersz
Ibi Piar (deporte)

Layout
Davienuska Janga
Maya Beaumont

Konsehero:
Bò Antoin
786-6818
Aviso
avisobon@gmail.com

Apsolushon pa sospechosonan di asesinato

AMSTERDAM – Korte a apsolvé e tres tinernan ku tabata enbolbí den un kaso di hinkamentu mortal riba un hòmer di 29 aña mas ku un aña pasá na Osdorp, Amsterdam. Segun Korte, e sospechoso prinsipal a aktua den defensa propio, NH Nieuws ta skirbi.

Ministerio Públiko a eksigí detenshon hubenil pa e sospechoso prinsipal, kende tabatin 15 aña tempu ku e asesinato tuma lugá.

E otro dos hòbennan tin 17 aña. Kontra nan a eksigí kastigu di trabou di 80 i 120 ora.

E hòmer di 29 aña di Nijmegen medio yanüari despues di trabou na Amsterdam, a haña pleitu ku e tres hòbennan menor di edat. Esaki a sosodé serka di un kòfishop popular na Sloterplas.

Un di e hòbennan a kue un kuchú i a hinka e hòmer tres biá. E mesun dia

e víktima a fayesé na hospital debí na e heridanán. Bisiñanan a tene dos siman despues un protesta silencioso kontra violencia sin sentido.

For di investigashon a resultá ku e hòmer di 29 aña, huntu ku dos kolega, a usa violencia fuerte kontra e hòbennan. Asina a bati i trapa un di e hòbennan miéntras e tabata na suela. Segun Hues, despues el a hinka e víktima.



Futbolista Vloet ta rekonosé uso di alkohòl

Demanda di tres aña i mei di prizòn pa aksidente mortal

HAARLEM – Futbolista profeshonal Rai

Vloet a atmití ku el a bebe dos te tres glas di

bebida alkohòliko promé ku e aksidente mortal na

2021 riba A4 na Hoofddorp. Dor di esaki un muha di kuater aña a perdé su bida.

Djaluna Vloet tabata dilanti Hues na Haarlem. Ministerio Públiko a eksigí 3 aña i mei di prizòn kontra Vloet.

Manera e mes a bisa, Vloet tabata ahustando e kontròl di velocidat momentu ku su outo a bai dal tras di un otro outo. Hues no ta kere e sos-

pechoso, pasobra djis promé ku e aksidente e tabata kore 203 kilometer pa ora. “Esaki ta muchu duru. I abo ta bisa: Mi a bai ahustá e kontròl di velocidat,” un reportero di Omroep West, ta sita.

“Mi ta hopi responsabel pa esaki,” Vloet a bisa tokante e desishon pa stür bou di influensia. Ministerio Públiko ta haña ku Vloet ta responsabel pa e aksidente mortal.



Detenshon atrako riba Jumbo

ROTTERDAM – Djaluna mainta polis a detené un hóben di 18 aña di Rotterdam, pa un atrako siman pasá riba un supermarket den e siudat. Durante e atrako, un trahadó di 59 aña a resultá seriamente heridá.

E atrako a tuma lugá na un supermarket di Jumbo na Rotterdam-Zuid ku ainda tabata será. Dos atrakadó a drenta e supermarket i a eksigí plaka. Dor di esaki nan a hinka e víktima di 59 aña.

Seguidamente bou di menasa di kuchú, nan a obligá e doño di e supermarket pa baha nan na Enk, mas òf ménos un kilometer mas aleu. No ta konosí ku e atrakadónan a bai ku plaka.

Djaluna mainta a detené e hóben di 18 aña den un hotèl na Rotterdam. Segun polis, e ta un di e dos atrakadónan, Rijnmond ta skirbi. Polis no ta ekskluí mas detenshon.



KÒRSOU

Furgel Wijngaarden Kantadó Mayó 2023

WILLEMSTAD—Furgel ‘Fedjay’ Wijngaarden a bai ku e premio máksimo di Kantadó Mayó 2023.

E komposishon yama Tata, pone bo man. Elia Isenia i Furgel Wijngaarden ta kompositor di letra i areglo tabata den man di Jovendrick Kirindongo.

Grupo Oriri a kompañá e kantante. Sharrel ‘Adjatay’ Denisia ku topa mi na daklo a resultá promé finalista, miéntras ku Naomi Overman a keda na di dos lugá ku Sklamashon na Shon grandí. Reinier Lijfrock a resultá na di tres lugá ku Sin Bèrgwensa.

Un vèlt di tènis bon bishitá a akudí djasabra pa mira e finalistanan den akshon. Tata, pone bo man, Tata nos ta roga bo pa pone man riba Kòrsou. Nos tin korona di la Birgen, korona di tronkon. Wèl no tin mas espasio pe koron’i divishon. Pone Bo man, man sanadó, Pone bo man, man milagroso, kubri nos kunuku, sana nos pais. Ta parti di letranan di e komposishon ganadó. Wijngaarden no ta un deskonosí den Kantadó Mayó i a yega di gana e título kaba den pasado.

Foto pa kortesia di ATK News.



RDK a informá riba ‘binding proposal’

WILLEMSTAD-- Refineria di Kòrsou (RdK) resientemente a informá e

tres partidonan ku a entregá un ‘binding proposal’ den e proseso ku tabata andando

pa yega na un partner stratégiko pa manehá i operá e refineria i Bullenbaai, ku ta

kulminá i sera e proseso ku nan a partisipá aden.

Esaki ta konforme e ‘process letter’ ku partidonan a bai di akuerdo kuné unabes ku RdK a inisiá e proseso di selekshon.

E proseso pa e búskeda pa un operadó i manehadó a kana debidamente konforme e loke a keda akordá for di inisio dor di Hunta di Akshonista i Hunta di Komisario di RdK, i konforme loke partidonan ku a partisipá na e proseso a bai di akuerdo kuné den e ‘pro-

cess letter’.

Esaki ta habri espasio pa RdK por inisiá un proseso nobo i aselerá di ‘headhunting’ pa yega na un partido pa manehá i operá nos refineria i Bullenbaai.

RdK mientrastantu a inisiá e trámitenan pa mas pronto posibel inisiá e proseso pa yega na un operadó i manehadó pa e fasilidatnan petrolero di Kòrsou.

Meta ta keda meskos, esta pa mas pronto habri e refineria di akuerdo ku e mandato di Gobièrnu.



Kaso di tiramentu ku herido

WILLEMSTAD-- Djadumingu 19 di mart 22.44’ sentral di polis a ri-sibí informashon di un kaso di tiramentu ku a tuma lugá na Berg Altena.

Unidat polisial ku a yega na e sitio no enkontrá e víktima ni e sospechoso na e sitio. For di un inves-

tigashon preliminar a sali na kla ku un ratu promé un hòmber lo mester a basha bala riba e vehíkulo ku tabata pasando na e sitio.

Durante di e tiroteo un hòmber ku tabata para den e área a sufri leshon na parti abou di su kurpa.

A transportá e víktima

a keda transportá den un vehíkulo privá den un situashon di preokupashon pa sala di Emergensia di CMC.

Kousa di e tiramentu te ainda no ta konosí i personal di departamento di reshèrshi ta kontinuá ku e investigashon.

Relashoná ku ladronisia

Shete vehíkulo konfiská

WILLEMSTAD--Durante di un investigashon relashoná ku kaso di ladronisia di vehíkulo dia 18 di mart 2023, polis a hasi konfiskashon di shete vehíkulo.

Djadumingu 19 mart doño di un di e vehíkulo a notifiká polis ku pa medio di su “GPS” el a tuma nota ku su vehíkulo ta na

altura di Grebbelineweg.

Mesora a dirigí un unidat na e sitio i na un depósito situá na Grebbelineweg a lokalísá e vehíkulo kasi intakto i seis otro vehíkulo mas ku tabata kompletamente pluma.

Investigashon den e kaso aki ta kontinuá.

ARUBA

Edwin Roos (SOGA):

Prensa mester keda corecto, obhetivo y balansa

ORANEJSTAD -- Diabierna ultimo a tuma luga un conferencia di prensa di Stichting Onroerend Goed Aruba (SOGA), cu ta doño di diferente edificio cu gobierno ta uzando. Pero riba e dia aki a enfoca riba e edificio di hospital y a bay en detaye di e proyecto y su status.

Edwin Roos, tesorero y vocero di SOGA, a cuminsa cu e conferencia cu un remarca personal. El a indica cu e ta tiki desapunta. E asunto aki ta andando pa dos siman y den e dos simannan aki ningun miembro di prensa a acerca

SOGA.

Den un medio el a lesa cu SOGA pa orguyo no a muestra interes pa yega na un solucion. Roos no ta kere cu como profesional, ta haci algo pa orguyo y riesga nan reputacion y perhudicando no solamente SOGA pero ta un proyecto esencial pa Aruba.

Si nan tin orguyo, den e trabao cu nan ta haci. Nan ta haci nan trabao diariamente, sirbiendo comunidad di Aruba y e no ta facil ora cu lanta mainta y scucha of lesa den media cierto cos cu sa cu no ta cuarta cu berdad y SOGA ta habri pa

acerca nan pa pregunta.

Relacion cu gobierno, hospital y e contratista ta bon, segun Roos. Circunstancia a pone cu a yega n'e situacion actual cu mester a dicidi di parti caminda prome cu bay asina leu cu no por pasa hunto mas. Pero despues di tanto aña cu e contratista OHL ta na Aruba, nan tambe kier mira e proyecto finalisa. Nan no lo t'ey te final, pero lo ta disponibel te fin di e proyecto pa asistencia si mester y pa consulta.

Concluyendo, Roos a indica di e tremendo impacto cu prensa tin riba comu-

nidad y Roos a pidi pa haci esfuerzo pa trece e noticia corecto obhetivo y balansa. Cu esey Roos a bisa di biaha cu e portanan di SOGA ta habri pa duna cualkier in-

formacion. El a remarca cu trabao di prensa ta hopi importante y necesario, pero e mester ta balansa si. Y esey el a haya tiki falta den e ultimo dos simannan.



Maneho dunando resultado!

Persona cu cuchiu a pone basta polis den accion

ORANEJSTAD -- Diabierna atardi rond di 5:30 por a scucha hopi sirena den Playa, esakinan tawata di patruyanan policial bayendo pa un caso serio.

E unidadnan di polis

a bay patras di Elmar, unda cu lo tawata tin un persona aparentemente cu cuchiu den man menasando hende.

Na yegada danki Dios no tawata tin nada di cuchiu. Por a mira polisnan papiando cu dos famia separa.

Na final y despues di basta papiamento polisnan a splica nan con mester encamina nan problema cu lo tin basta tempo y ta relaciona cu placa.



Turistanan di calidad yegando Aruba

ORANEJSTAD -- Minister di Turismo, sr. Dangui Oduber, a caba di ricibi e resultadonan di luna di februari 2023 di Aruba su turismo. Aruba a experencia un recuperacion di 105% den comparacion cu februari 2019.

Segun e proyeccionnan cu tin pa aña 2023, Aruba lo surpasa e nivelnan di aña 2019 y e resultadonan di lunanan di januari 2023 y februari 2023 ta confirma esaki. Maneho di Minister Oduber ta dirigi riba un maneho di turismo sostenibel, enfocando riba

turistanan di calidad cu tin un entrada anual di riba \$150.000, haci inversionnan continuo den producto Aruba y percura pa diversifica Aruba su turismo.

Den luna di februari 2023 e resultadonan ta demostra un performance sublime di hotelnan. Prijsnan cu turistanan ta pagando pa hospeda na Aruba ta esun di mas halto den historia di nos pais. AHATA a caba di publica su resultadonan di februari 2023 y esaki ta muestra cu e "average daily rate" pa anochi na Aruba ta \$422.92.

Booshi a bay Hof y a dal den muraya

ORANEJSTAD -- Ex-minister Booshi Wever no a keda satisfecho pa e forma con Ministerio Publico a atende cu un keho di dje contra Otmar Oduber. El a dicidi di bay Hof pero eynan tambe el a dal den muraya. E resultado tabata negativo p'e. OM a manda un declaracion diasabra cu ta bisa lo siguiente: "Corte Superior a dicidi cu señor C.A.S.D. Wever no ta admisibile (niet-ontvankeli-

jk) den su keho. Wever a dirigi su keho contra e hecho cu Ministerio Publico no a tuma un decision pa persigui, entre otro, minister anterior O. Oduber pa soborno, falsificacion y estafa acerca di e aanbesteding y gunning di compra di e incinerator. Contra e hecho aki di Ministerio Publico Wever a entrega un keho na Hof na october 2022. Su keho pues a wordo declara inadmisibel."

STATIA/SABA/ST. MAARTEN

Parlamentario Brison detené riba sospecho di korupshon

PHILIPSBURG – Djabièrnè 17 di mart funshonarianan di reshèrshè di Reino a arestá miembro di Staten di St. Maarten, Rolando Brison, riba sospecho di korupshon. A investigá e ofisina di e polítiko den e edifisio di Parlamentario, meskos tambe loke Ministerio Públiko ta yama su lugá di keda.

E detenshon a tuma lugá den kuadro di un investigashon penal yamá Lissabon, pa kua ta eksistí e sospecho ku e Parlamentario a tuma regalo i a hasi malu uso di su posishon. Ministerio Públiko no ta ekskluí mas detenshon i entrada hudisial. Sí ta trata di e kon-

tra partido, no ta konosí.

E investigashon ta ehèkutatá dor di e tim di reshèrshè di Reino, RST, bou di guia di e tim sentral di Parkèt Kòrsou, St. Maarten, Boneiru, St. Eustatius i Saba. E tim akí ta dirigí su mes riba aserkamentu spesialisá di korupshon i froude.

Brison tabata lider di frakshon di e partido i gobièrnu United Peoples Party. Na novèmber el a baha komo presidente di Staten despues ku grabashon di zonido a lèk den kua e tabata ekspresá su mes ofensivo tokante koleganan parlamentario i minister. E tempu ei el a deklará di ta bai traha mihó pa bira un

mihó hende. Un aña pasá Korte a sentensí'è pa culpa di hür atrasá i daño ku el a laga tras na e villa.

E detenshon di Brison ta amplia e instabilidat di Gabinete Jacobs, di kua ya e suerte tabata di e sosten di toleransia di dos miembro di Staten independiente. Mas aun pasobra djaluna tabatin e tratamentu di e presupuesto di e aña ku a pasa riba agènda. Pa Tweede i Eerste Kamer, Brison no ta deskonosí. Pa hopi aña kaba e ta partisipá na e konsulta interparlamentario di Reino di kada mei aña i algun siman pasá ainda e tabata na e enkuentro na Kòrsou presente. Desde 2010 dies

polítiko di St. Maarten a bai dilanti di Brison, komo sospechoso di òf entre tantu sentensia pa korupshon i froude di impuesto. Despu-

es di interogashon a laga Brison den libertat, pero e ta keda sospechoso, Ministerio Públiko ta enfatisá.



Promé Minister Jacobs:
Interrogante 'timing' pa detenshon di Brison

PHILIPSBURG – Den su reakshon riba detenshon di miembro di Staten, Rolando Brison, parse Promé Minister Silveria Jacobs, tin su interrogante riba e 'timing' di Ministerio Públiko: "It is uncanny that these investigations surface at times when they can alter local political stability, and it begs the question it is indeed geologically or locally instigates." Jacobs den un deklarashon ofisial ta pone un relas-

hon entre e momentu di e detenshon i e tratamentu di e presupuesto ku a inisiá djaluna. "Nos ta keda komprometé, komo un koalishon, pa fokùs i atendé e presupuesto, loke ta hopi importante pa e hende di e pais akí."

E promé minister ta bisa mas aleu ku el a spanta i ta preokupá i ta deseá Brison, su famia i partido, hopi forsa durante e tempu difisil akí i ta kontentu ku djasabra anochi a laga e parlamentario den libertat.



Selebrashon Dia Himno i Bandera di Aruba

PHILIPSBURG— Djasabra Promé Minister i Minister di Asuntunan General, Silveria Jacobs, a selebrá Dia Himno i Ban-

dera di Aruba na Seventh Day Adventist Church na Cole Bay, organisá pa miembronan di Chuchubi Foundation.

Despues ku Eleanor Le-tang a duna honor spesial na e miembronan, Promé Minister a atendé un seremonia pa e bandera di Aruba.



Beisbòl Kopa Lito a sigui

KRALENDIJK--Fin di siman pasá e torneo di beisbòl di nos futuronan pa loke ta trata Kopa Lito/Pony a sigui durante henter fin di siman pasá ku basta partido na Dudy Josephia Ballpark na Tera Kòrà.

E weganan tabata djaweps, djabièrnè, djasa-bra i djadumingu último.

Resultado partidonan.
Djaweps 16 mart 2023.

Kategoria 6U.
Wolfpack a gana Dreamers C 15-3.

Kategoria 8U C.
Wolfpack a gana Dreamers 20-8.

Wolfpack B a gana Wolfpack A 15-12.

Kategoria 10U.

Wolfpack a gana Dreamers 15-3.

Picher ganador ta Zyrick de Jesus.

Stars a gana Dreamers 15-6.

Picher ganador ta Jenly Zabala.

Padres a laga Dreamers den tereno ku skor di 7-6.

Picher ganador ta

Djayden Mercera.

Padres a gana Wolfpack B 11-9.

Picher ganador ta Devona Rosario.

Wolfpack B a gana 7-5.

Picher ganador ta Hayden Dominguez.

Kategoria 16U.

Wolfpack a gana Stars 17-3.

Picher ganador ta Steph-Zion Levenstone.

Dreamers a gana Stars 29-5.

Picher ganador ta Sergio Thomas.

Fin di siman pasá tabatin un total di 11 wega.

E torneo ta sigui fin di siman benidero.

Clayson a pasa promé kurso empayer avansá ku éksito

KRALENDIJK--Clayson Cicilia a pasa promé kurso empayer avansá ku éksito na Repùblika Dominikana

Empayer Clayson Cicilia, a pasa promé kurso pa empayer avansá rumbo pa empayer sèrtifiká ku gran éksito siman pasá na Repùblika Dominikana.

Tantu Clayson komo tambe empayer Muelens ku

ta hasi tur posibel pa Clayson ta un empayer sèrtifiká ku oportunitat pa por yega hopi leu ku esaki, ta sumamente kontentu ku e logro aki.

Clayson foi momentu ku e oportunitat a presentá pa esaki, ta sumamente kontentu i buta su dilanti ku e ta bai pa logra esaki.

E la hasi hopi esfuerso pa por realisá esaki i tin e

promé parti tras di lomba i ta sumamente agradesido na empayer Meulens di Aruba, ku ta hasi máksimo esfuerso pa e logra esaki.

Nos ta sigui esaki hopi djaserka i asina ku tin novedat nos ta amplia riba esaki.

Nos ta felisitá Clayson ku e promé parti di e kurso i deseá Clayson tur pero tur klase di éksito.

Stars Bonaire a pèrdè den sòftbòl na Aruba

KRALENDIJK--Tim di sòftbòl veterano 60+ ku ta Stars Bonaire, fin di siman pasá ku e torneo himno i bandera di Aruba, a kai vensí den e torneo pèrdendo su dos partidonan di e torneo regular I ota logra yega e parti final di e torneo.

Informashonnan ku nos

tin ta musta ku bateo no a kompañá Stars Bonaire den e torneo. Nan a hunga dos partido di e torneo regular i kai vensí den tur dos partido ku skor di 5-1 i 4-1 i no ta logra klasifiká pa sigui pa semifinal di e torneo.

Stars Bonaire a regresá kas djaluna último den oranan di mainta.

Nos a komprondé ku Stars Bonaire na su regreso foi Aruba lo kuminsá ku preparashonnan pa torneo na hèrmana isla Kòrsou.

Dia 2 di yùli Stars Bonaire lo biaha pa Kòrsou pa torneo aya a Kòrsou.

Asina ku nos tin mas informashon nos lo amplia riba esaki.

FC Champs 2-0 riba Hobon

KRALENDIJK--E tim di futbòl veterano, por sierto un tim bastante aktivo ku ta FC Champs, djasabra último den oranan di atardi, den partido ku a tuma lugá na Fèlt Elion Flores na Amboina, a gana di Hobon ku skor di 2-0 den partido di futbòl veterano 50+.

E dos ekiponan veterano 50+ a hunga un tremendo

partido kontra otro, di kua FC Champs 50+ bai ku e viktoria di 2-0 riba Hobon.

E ekiponan a demostrá tremendo futbòl veterano na nivel pero tabata FC Champs ku a sali di porta grandi ku e viktoria di 2-0.

E golnan di e partido tabata di Jair Bernabela i Servacho Bomba ku a hinka e golnan pa FC Champs gana

Hobon ku e skor di 2-0.

Djasabra awó 25 di mart FC Champs 50+ ta enfrentá e ekipo di Tera Blanku 50+ pa 5or atardi na Fèlt Elion Flores na Amboina.

Nos ta deseá e ekiponan tur klase di éksito den e partido.

Otro siman nos lo bini ku e resultado di e partido aki.

Plei-òf Bola-8 ta sigui awe

KRALENDIJK--Plei-òf di biliart bola-8 ta sigui e siman aki ku dos partido mañan djamaris 21 i djaweps awó 23 di mart 2023, esaki ku partidonan ku ta tuma lugá 19:30 den sala di biliart di Kompleho Deportivo Jorge Nicolaas na Kaya Amsterdam.

Partido djamaris 21 mart 2023.

Pa loke ta trata e partido pa awe djamaris 21 di mart 2013, riba e dia aki ta enfrentá otro e ekiponan The Untouchable i Azteca 19:30 anochi.

Pa loke ta e partido djaweps awó 23 di mart 2023, riba e dia aki ta

topa otro e ekiponan La Tropicana i Mastertouch 19:30 na Kompleho Deportivo Jorge Nicolaas na Kaya Amsterdam.

E partidonan pa e siman aki sigur tei bira dos otro tremendo partido, sigur hopi interesante por sierto rumbo pa yega final di e campeonato ku ta un seri mihó di tres di kua e ekipo ku gana dos wega ta titulá kampion.

Éksito na e ekiponan den e plei-òf ku nos sigur ta sigui esaki hopi djaserka pa abo ta bon informá.

Keda pendiente pa e partidonan ku falta ainda di e plei-òf.

Arnuat Construction B.V.

ta buska

- 2 metselaar

Inf. tel. nr 795-4292

**Pa info i komunikado den
Extra/BONERIANO**

Redakshon:

extrabon@gmail.com

Aviso mail:

avisobon@gmail.com

Awe ta 'Dia Internashonal di Mondí'

Mondi saludabel pa hende saludabel

Asamblea General di Nashonnan Uni a proklamá dia 21 di mart komo Dia Internashonal di Mondí. E dia aki ta pa selebrá i amplia konosementu di e importansia di tur tipo di mondi. Na Papiamentu ta definí mondi komo un área ku hopi mata ku hende no a planta. Na ingles nan ta yama un área asina aki 'forest'.

E definishon di forest ta un área òf tereno na unda mata ta predominá sin intervenshon di hende. Algun karakteristiká di mondi ta e.o. konsentrasjon di mata na kantidat, haltura di e matanan, balor den uzo i área i su funshon ekológiko.

Botika

Lokalmente mondinan tin importansia i ta aportá na humanidat. Solamente si e mondinan ta den estado saludabel nan por ofrese humanidat benefisionan ku ta aportá na salú di hende. E tema pa e aña aki ta "Mondi saludabel pa hende saludabel".

Den e relato aki ta duna diferente ehèmpel, unda ta

splika kon mondi den estado saludabel ta aportá na salú di humanidat. Ademas lo inkluí kiko por hasi pa duna mondi un man. Ta konsiderá mondi komo botika natural.

Tin mas di 50,000 sorto di mata na mundu ku tin balor medisinal. Den áreanan di mondi salbahe tin komunidatnan chikitu ku ta uza matanan komo medisina natural. Pero tambe tin medisina farmaceutiko ku ta bini di matanan di mondi salbahe. Ta uza algun di e matanan pa traha remedi ku ta kombati malaria òf tambe kanser.

Por ehèmpel, ta uza e remedi ku ta derivá di e mata 'periwinkle' di Madagascar, ku tin paresido na e famia di e sorto magdalena. Ta uza e mata pa traha remedi farmaceutiko pa tratamentu di pashènt ku ta sufrí di kanser. Lokalmente tin hopi mata ku antepasadonan tabata uza pa traha asina yamá remedi i tera.

Por bisa ku e práktikanan no a resultá di ta sostenibel ni tampoko kom-

probá científicamente. Pero lokual ta trata frutanan manera lamunchi òf shimaruku, ta komprobá ku nan tin hopi vitamina C, ku sigur ta kontribuí na nos salú. Mondí saludabel ta protehá humanidat kontra malesa. Mondí ta sirbi komo barera natural pa kombati transmishon di malesa di bestia pa hende. E riesgo ta bira mas haltu pa hende su salú ora ku tin di deforestashon na gran eskala, ku ta enserá rosamentu di mondi.

Felter

A raportá mas di 30% di malesa nobo despues di añanan 60, ku ta atribuí na kambio di uzo di suela. Hende a bai mas den desaroyo i a kita mondinan grandi na un manera no sostenibel. Esaki enbes di planta i kria di bestia.

Áreanan di mondi ta yuda fortalese salú mental i físiko. Pasa mas tempu den naturalesa ta oumentá emoshon positivo, ku ta yuda baha nivel di strès, preshon, depreshon, kansansio, ansiedat i tenshon.

Palunan di mata den área

di siudat ta apsorbé gasnan ku ta kousa polushon, okashoná pa tráfiiko. Mata ta sirbi komo felter pa e partíkulananan chikitu manera stòf, sushi i huma.

Mondinan salbahe ta un parti sentral pa kombati e menasa di mas grandi pa salú ku humanidat ta konfrontá, esta kambio di klima. Mondí salbahe den kondishon saludabel ta yuda tene e temperatura global na nivel i den balansa.

Mondí i matanan ta yuda kontra temperatura haltu i klima ekstremo, ku ta un reto di salubridat na nivel mundial. Por pensa riba ola di calor, kalamidatnan ku konsekuensia devastador.

Lokual por hasi pa yuda ku e temperatura haltu ta hasi adaptashon den diseño di kas, inkorporando mata. Por ehèmpel, laga mata grandi na nan lugá ora di prepará tereno pa konstruksion.

Mata posishoná na manera adekúá rònt di edifisio ta yuda tene e temperatura i aire fresku. Tur esakinan ta baha e nesidat di instalá èrko i asina ta skapa gastu haltu di korie.

Rosamentu

Mondinan ta bou di menasa i mester di ayudo. Mondinan ta bai pèrdi na gran eskala pa motibu di rosamentu. Manera menshoná, mata i mondi ta yuda humanidat.

Hopi bia no ta para ketu i realisá benefisionan ku mondinan ta ofrese. Por ehèmpel, ora ku bebe un glas di awa huntu ku e paracetamol, traha kas, skirbi buki, kasi nunca ta pensa riba e konekshon ku esakinan tin ku mondi. Esaki hopi otro aspekto di bida ta konektá ku mondi salbahe. Pero lokalmente hopi kier sigui desaroyá, traha kas òf edifisio di negoshi. Invershonistanan ta bini di

eksterior ku deseo pa traha hotèl i edifisio sin tene kuenta ku tin regla i ta deseá rosa terenonan plat, sin tene kuenta ku por ehèmpel maneho di permit pa planta. E daño i desbalansa ku esakinan ta krea tin ora ta ireparabel. Bestia ta pèrdè nan habitat, ku den sierto kaso ta e matanan. Áreanan kompletamente rosá ta haña temperaturanan mas haltu ku normal.

Tin okashon e suela ta degradá i ta okashoná erosion i òf inundashon. Konsekuentemente, pa falta di kreatividat i falta di respet pa naturalesa i regla, tin mas edifisio i ménos mondi. DNM ta boga pa un maneho i uzo sostenibel. Esaki ta e yabi pa kombati kambio di klima. Probablemente asina ta aportá na prosperidat i bienestar di e generashon aktual i esun ku ta sigui.

Krusial

Mondinan tin un ròl krusial den aliviá pobresa na mundu. Nan ta kontribuí pa alkansá e metanan di desaroyo sostenibel proponé pa Nashonnan Uní pa 2030 (SDG's). Mondinan tin hopi benefisio pa salú di hende; ta purifiká awa, kapturá karbon pa kombati kambio di klima, ta proveé kuminda i yuda ku nesidat di medisina pa salba bida di hende. Asina por mira ku mondinan ta aportá na bienestar general di hende. Mondinan ta aportá hopi na hende su salú, físiko i tambe mental. Dia Internashonal di Mondí ta boga pa no solamente rosá mondinan, pero tambe duna bèk i aportá.

Ban sigui planta i yuda e matanan ku mester di mas awa pa krese, produsí fruta i berdura, pa asina nan sigui duna tur e otro benefisionan ku nan tin.

Fuente: Directie Natuur en Milieu (DNM) di Aruba.



Limpiesa na Klein Bonaire



Despues di haña un lès serka Trinity Tew tokante sushi di laman, Junior Rangers di STINAPA, rangernan di Parke Marino i boluntarionan, a duna Klein Bonaire un tiki amor, dor di piki sushi ku tabatin kant'i laman. Trahando huntu nos por logra tur kos.

CHANGAN WORKFORCE



M201 SEVEN SEATER



\$13,995

M401 ELEVEN SEATER



\$17,995

MS201 DOUBLE CABIN



\$15,995

M401 CARGO



\$14,995

MD201 FLAT BED



\$12,995

M201 CARGO



\$11,995

MD201 COOLING BOX



\$17,995



/dabboussimotors

786.6662